

有別樣經營然後庶幾成效其所以經營者不出於漁鹽貿販設屯數件事而設屯尤為切實蓋不得其人而施措失宜則利少害多不可不謹始而擇任竊聞前同知尹調元素有幹局之才而尤長於治農生財之道無不通曉今此料理之際不可無此人而但調元方在忠清道堤川地作散無職名令兵曹姑先付軍職催促上來之意敢啓 從之○戊辰玉堂上劄請勉抑至情亟寢朔祭親行之命 不從○夜乾方有氣如火光○已巳 上下教曰近日天寒甚緊各處守直軍士不無凍傷之患令該曹察其尤甚衣薄者分給空石○夜東方有氣如火光○十一月朔庚午 上幸魂宮祭朔祭○上下教曰前仁城君珙前後之事或出於怵禍或係於無情故每擬一番論釋而重違公議迨未發端今聞其母病勢苦劇言念母子情事不覺淚下使母子不得再見而永訣則非但予心後世不安 先王在天之靈亦必有恨放釋與否急速議大臣俾及來見議于大臣則左議政尹昉以為公議至嚴有難輕議而 聖旨懇惻殆不忍讀臣不敢有異右議政吳允謙以為伏承 聖教至誠懇惻誰不感動珙之被謫今已二載國法行而公論伸矣因茲放釋使母子得以生前相見公義私恩可謂兩全臣不敢有別議遂遣中使護來且命本道監司以駕轎護送○以鄭